



PARTURE NI PESTA PARNINGOTAN ARI HANANA EK NI TUHAN JESUS

TOPIK :

“TARHINSAT JESUS TU BANUA GINJANG JALA RO IBANA MUSE”

 **Ev: Ulaon ni Apostel 1: 1 - 11**

 **Ep: Psalmen 68: 16 - 20**



HURIA KRISTEN BATAK PROTESTAN (HKBP)
Kamis, 14 Mei 2026

1. Manghalashon Jesus naung Manaek tu Surgo

L : Huria na hinaholongan ni Tuhanta. Marlas ni roha do hita ari on, manghalashon parningotan ari Hananaek ni Jesus Kristus ima dalan, hasintongan dohot hangoluan i. Ia manaek Ibana tu banua ginjang, ndada na naeng manadinghon hita, alai naung sahat do Ibana tu habangsaNa jala mangarajai salelenglelengna. Tahalashon ma hananaekNa tu surgo dibagasan pujipujian dohot roha mauiliate, ala Ibana naung manaek i na ro do Ibana muse mangalap hita. Taungkap ma rohanta marsomba tu Raja naung monang i jala naung mangarade inganan di hita, marende ma hita.

2. MARENDE BE. HKBP No. 99: 1 - 3 “O ULUBALANG NA GOGO”

♫♫ O ulubalang na gogo songon sadari on do Ho manaek tu hasangapon. Naung sidung do ulaonMi na ringkot patupaonMi humophop hajolmaon. Sabam, tongam do Ho muli tu na uli marhabangsa di siamun ni Jahowa. ♫♫ Marloksaloksa serapim, marriburibu kerubim mamuji Ho na monang. Dibaen naung pinadomuMi saluhut manisias i tu Debata di ginjang. Puji,puji Jesus Kristus naung patulus saluhutna tinonahon ni AmaNa.

----- *Jongjong* -----

♫♫ O Jesus Ho do ulu ni saluhut na porsea i, ruasMu anggo hami. Ho hangoluannami on, Ho hasonangannami on, Ho hagogoonnami. Suru, togu rohanami asa hami mangalehon tu Ho nasa hasangapon.

3. VOTUM – INTROITUS – TANGIANG

P : Marhitehite Goar ni Debata Ama dohot Goar ni AnakNa, Tuhan Jesus Kristus dohot Goar ni Tondi Parbadia, na tumompa langit dohot tano on. **Amen.** Songon on do didok Tuhan i: BahenonHu do sogot na monang i rap dohot Ahu hundul di habangsangHi, songon Ahu na monang i jala hundul rap dohot Damang di habangsaNa i. **Haleluya!**

H : (Mangendehon) ♫♫ *Haleluya... Haleluya... Haleluya.*

P : **Martangiang ma hita!** Ale Tuhan Jesus Kristus, Anak ni Natumimbul i, naung manaek tu banua ginjang jala hundul tu siamun ni Debata! Sai suru ma Tondi Parbadia tu rohanami, asa Ibana tongtong mangajari rohanami. Lehon tu hami parhalado na burju tu HataM, pargogoi ma nasida, asa tongtong diradoti nasida ulaonna jala asa marsahala nasida mangalo bisuk ni sibolis i, asa tung rarat harajaonMu di hasiangan on, paima sude musuM

peak di toru ni patMu. Sai pamonang ma hami saluhutna manaluhon dosa dohot hamatean marhitehite Ho, ai Ho do na mangolu dohot na manggomgomi rap dohot Ama i dohot Tondi Parbadia. Amen.
(Hundul)

4. MARENDE BE. HKBP No. 97 : 1 + 5 “INGOTON MA SADARI ON”

Ingoton ma sadari on parnaek ni Tuhan Jesus. Tu habangsaNa na tongtong na so tarbaen be meret. Tasomba ma Tuhanta i naung mulak tu AmaNa i tapuji ma Ibana.

O Jesus Tuhannami on asi rohaM di hami. Sai tatap hami na dison di paraloannami. Patogu hami sasude tumpahi hami monang be ro di ujungna sogot.

5. P A T I K

P : Tatangihon ma Patik ni Debata, Di minggu “Parningotan Ari Hananaek Ni Tuhan Jesus” i ma sian **Markus 16:15-16**: Jadi ninna ma mandok nasida: “Laho ma hamu tu liat portibi on, jamitahon hamu ma Barita Nauli i tu nasa na tinompa. Na porsea jala tardidi dapotan haluaon; alai na so porsea i, hona uhum do.

I do sahatna. Antong, rap mangido gogo ma hita tu Tuhan Debata!

P+H: Ale Tuhan Debata, sai pargogoi ma hami mangulahon na hombar tu PatikMi. Amen.

6. MARENDE BE. HKBP No. 686 : 1 , 3 ”RAMUN DO AU”

Ramun do au di joloM i, gok dosangki urasi au. O Jesus Birubiru i dison do au patau ma au

----- (Jongjong) -----

Ala denggan ni basaMi ro au tu Ho o Jesushi. Parbadiai ma rohangki dison do au patau ma au.

7. MANOPOTI DOSA

P : **Tatopoti ma dosanta, martangiang ma hita!**

Ale Tuhan Debata Pargogo na so hatudosan jala Amanami! Hujou hami do GoarMu na badia i, ala na targogot hami marningot dosanami. Sai marasi ni roha ma Ho mida hami on. O Tuhan Jesus Kristus, Anak ni Debata na gabe

jolma ala ni hami, na mate jala na hehe sian na mate, na manaek tu banua ginjang do Ho mangondihon hami! Asi ma rohaM di hami, sai patongtong ma di hami roha hamauliateon tu Ho. O Tondi Parbadia, pangapul di na marsak roha, pamalum ma saluhut na bernit binahen ni dosanami! Ro ma Ho mangingani hami, asa marlas ni roha hami mangulahon lomo ni rohaM. Ho do parhitean ni nasa asi ni roha, sai unang tulak hami. Sai tangihon ma hami, Ho ale Debata Ama, Anak dohot Tondi Parbadia. Amen.

Bagabaga ni Debata taringot tu hasesaan ni dosa!

Ise be mangaluhon angka na pinillit ni Debata? Debata do na mamintori. Ise do na mandabu uhum hamagoan? Kristus Jesus do naung mate, alai ndada holan i, naung mulak mangolu do, jala di siamun ni Debata do Ibana mangondihon hita. *Hasangapon ma di Debata na di ginjang.*

P+H : Amen.

(Hundul)

8. MARENDE BE. HKBP No. 587 : 1-2 “TAENDEHON LAS NI ROHA”

♪♪ Taendehon las ni roha pasangaphon Tuhan i. Roha holong na mangonjar laho mangendehon i. Ganup ari ganup borngin unang lupa ho disi. Angka ende na umuli sipasangap Tuhan i. Nang parhinaloan i baen pasangap Tuhan i.

♪♪ Taendehon las ni roha sipadame roha i. Tung dao do badabada dohot angka hosom i. Hadameon ni Tuhanta i do sitiruon i. Tapalambas ma rohanta, mida angka dongan i. Na martua do sude na lambok marroha i.

9. E P I S T E L

P : Tatangihon ma Hata ni Debata turpuK Epistel di Pesta Parningotan Hananek ni Tuhan Jesus sadari on, tarsurat di **Psalmen 68:16-20:** Dolok ni Debata do dolok Basan, gok angka punsu do dolok Basan i.

H : Boasa sai mangiburu hamu ale angka dolok na timbo dompak dolok Sion na pinillit ni Debata bahen ingananNa? Sai inganan ni Jahowa do i salelenglelengna.

P : Marriburibu do hureta ni Debata, di tongatonga nasida do Tuhan I, hira Sinai di bagasan habadiaon.

H : Nunga manaek Ho tu ginjang, ditaban Ho do na hona taban, nunga maruli silehonlehon Ho di tongatonga ni manisia, nang angka na marbalik, asa maringan disi Debata Jahowa.

P : Pinuji ma Tuhan i ganup ari. Dokdok pe dipaporsanhon tu hita, Debata do mangurupi hita. *I do sahatna. Martua do angka na tumangihon Hata ni Debata, jala na umpeopsa. Amen.*

10. MARENDE BE. HKBP No. 100 : 1-2 “MARDONGAN OLOPOLOP MANAEK TUHANTA I”

♫♫♫ Mardongan olopolop manaeq Tuhanta i. Jinangkon ni na torop surusuruan i. Antong nang hita pe, tapuji ma Tuhanta, marendeende hita marolopolop be

----- Jongjong -----

♫♫♫ Na mulak do Tuhanta tu habangsaNa i. Tung lambung ni AmaNa di siamunNa i. Disomba sasude na di banua ginjang, Tuhanta i na monang ro sian tano i.

11. MANGHATINDANGHON HAPORSEAON

P : Tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok :

H : Ahu porsea di Debata Jahowa.... d.u

(Hundul)

12. K O O R

13. REFLEKSI: Mangauhon Hananaek ni Tuhan Yesus di tonga ni bagasta

P : Huria na hinaholongan ni Tuhanta. Di hananaek ni Tuhan Yesus, dipasunggulhon do tu hita, ingkon rade “melepas” untuk mengalami na umuli. Di na tarhinsat Yesus tu ginjang, hira na marsirang salelengna do panghilalaan ni sisean i. Hira na agoan, ganggu rohana ala Guru na gabe haposannasida saleleng on ndang rap be dohot nasida. Songon panghilalaan ni sisean i do sipata hita di keluarga. Adong do tingkina, natoras ingkon marsirang sian ianakhonna ala borhat tu pangarantoan, manang ingkon tadinghononta ngolu naung nyaman laho manjalo ulaon na imbaru. Hananaek ni Tuhan Yesus mangajari hita, “melepaskan” ndada i ujung ni saluhut. Manaeq Yesus tu banua ginjang, asa boi do saor Ibana tu na umbidang, ndang be diambati inganan, nunga boi Ibana ro tu kamar ni angka ianakhonta na marungkil ala parsiajaraan manang pardonganonna; ro mandongani ina di na loja marhobas di dapur mangarade sipanganon, songon i nang tu parkarejoan ni angka ama na godang mangadopi hamaolon.

R : Tuhan Jesus, papos rohanami di haradeonMu ro jala saor tu hami di ganup inganan dohot ulaonnami.

P : Di zaman on, jotjot do tarjorat hita di kehadiran na semu. Rap hundul do hita di sada sofa, alai ganup do lalap mamereng na masa sian ponselna be. Hananaek ni Tuhan Jesus manjou ganup keluarga asa marsiajar taringot tu “kehadiran batin”. Nang pe ndang diida simalolongta Jesus, alai porsea do hita na adong do Ibana. Laos songon i ma di keluarga; pangajarion haporseaon na ummuli ima molo ganup ruas ni keluarga manghilalahon holong dohot dukungan ni anggota keluarga, nang pe so paadopadop bohi hita dohot nasida. Molo rap dibagasan jala niihot ni tangiang, ndang diambati inganan na holang manang dao hita masihaholongan.

R : Ale Tuhan Jesus, paingot ma hami tongtong, asa huharingkothon hami mangaradoti parsauran niihot ni tangiang.

P : Jesus Siparmonang nuaeng manaek tu surgo, diondihon Ibana do hita sahat tu hasangapon i jala dijou hita gabe sitindangiNa. Alani i molo taulahon angka ulaon nang pe na metmet alai dibagasan bulus ni roha: isara ni mangula ulaon di jabu so pola marungutungut, tangi tu holso manang hoihoi ni dongan sabagas, benget mangajari angka ianakhon, angka na uli jala arga do i. Gabe sitindangiNa ndada ingkon patupaonta ulaon na balga. Gabe sitindangi di tonga ni keluarga ima: papatarhon ngolu na marimpola:nionjar ni holong ni Tuhan, di tonga ni portibi na gok hosom, marpamuati rohanta di angka hahurangan ni dongan.

R : Ale Tuhan Jesus, patau ma hami haposan di angka ulaon na metmet, asa pasahatonMu tu hami ulaon na umbalga.

P : Nuaeng, ndang apala manontu taida parngoluon (geopolitik) di portibi on, alai hananaek ni Tuhan Jesus mangalehon pos ni roha na hot tu ganup keluarga: ndang portibi on ujung ni pardalananta, alai surgo do. Panghirimon sisongon on ma margogoihon keluarga asa unang mura matapor (pecah), atik pe rongom hamaolon ni ekonomi jala lam menurun hahipason. Manahan hita, ndada ala gogo hita, alai ala taboto “Uluan ni Keluarga” na sasintongna ima Jesus, nunga monang jala parade inganan di hita.

R : Parrohai ma hami ale Tuhan, asa marlas ni roha hami manghirim, benget di haporsuhon jala jugul martangiang.

P : Hananaek ni Tuhan Jesus manguba panatapanta tu tarup ni jabunta. Unang ida tarup ni jabum gabe ambatambat hasasaorta tu Tuhanta, alai ida ma i gabe harbangan manjanghon pandonganion dohot parlinggoman na manongtong sian Tuhanta tu pangisi ni bagasta. Taujungi ma ganup ari dibagasan tangiang dohot roha mauiate, disi do hilalaonta, ia Jesus naung manaek tu surgo i sai mian do Ibana di tonga ni bagasta.

R : Ale Tuhan, suru ma TondiM manggomgom hata nang ulaonnami. Paimbaru rohanami jala topot hami di asiMi, Amen.

14. SUNGGULSUNGGUL

15. K O O R

16. PAPUNGU PELEAN HUHUT MARENDE BE. HKBP No. 101 : 1... “TAITI GOGO IHUT TU HO” (Pelean Ia & Ib)

♪♪♪ Taiti gogo ihut tu Ho palungun rohanami. Tu surgo i ingananMi
O Jesus Tuhannami.

♪♪♪ Togu tongtong ma hami on di dalanMi tu surgo. Anggo so i oloanMi sai saut
do hami mago.

-----Musik-----

♪♪♪ Alai tahe suraon be so oloanMu hami? PinorsanMi do dosa i
Lao paluahon hami.

♪♪♪ Dibahen i O Jesushi, sai naeng ihuthononhu, do Hatami
Nang langkaMi saleleng au mangolu.

-----Musik-----

♪♪♪ Taiti gogo ihut tu Ho au tu banua ginjang. Asa disi pujionhi
Denggan basaM O Tuhan.

17. J A M I T A: Ulaon ni Apostel 1:1-11

18. PAPUNGU PELEAN HUHUT MARENDE BE. HKBP No. 461 : 1... “SONGGOP TU HAMI” (Pelean II)

♪♪♪ Songgop tu hami na di joloM on O Tondi ni Debatangki.
Uhir patikMu tu rohangkinon O Tondi ni Debatangki.
Bereng siholhu di haroroMi, molo Ho ro nda hisar tondingki
Didihon ma tu au on apiMi o Tondi ni Debatangki.

♫♫ Suru TondiM paluahon au on, palua ma o Debata
Bereng dagingku tondingku dison palua ma o Debata
Dao ma pangambat di soaraMi, hisap ni daging sandok diringki
Na mangarsahi tongtong TondiMi palua ma o Debata.

-----Musik-----

♫♫ Lehon HataM i ma tau podanghi, Debatangki na gogo i
Asa sai talu sude musuM i, Debatangki na gogoi
Manghatindanghon tongtong goarMi, asa malua pardosa disi
Asa dijanghon Tuhanta ma i, Debatangki na gogo i.

**17. TANGIANG PANGUJUNGI: Tangiang Pelean – Tangiang Pesta
Hananaek-Tangiang Ale Amanami - Tangiang Pasupasu:**